

O Real decreto 1275/2003, do 10 de outubro, establece nos seus anexos I e II as vitaminas e minerais, así como as substancias vitamínicas e sales minerais que se poden utilizar na fabricación dos complementos alimenticios.

Recentemente, a Autoridade Europea de Seguranza Alimentaria emitiu e publicou unha avaliación científica favorable relativa a determinadas substancias vitamínicas e sales minerais.

Por isto, a Comisión Europea adoptou a Directiva 2006/37/CE da Comisión, do 30 de marzo de 2006, pola que se modifica o anexo II da Directiva 2002/46/CE do Parlamento Europeo e do Consello, en canto á inclusión de determinadas substancias.

Mediante esta orde trasponse ao ordenamento xurídico interno a Directiva 2006/37/CE da Comisión, do 30 de marzo de 2006, de acordo co establecido na disposición derradeira terceira do Real decreto 1275/2003, do 10 de outubro.

Na súa tramitación foron oídos os sectores afectados, consultadas as comunidades autónomas, e emitiu informe preceptivo a Comisión Interministerial para a Ordenación Alimentaria.

Na súa virtude, por proposta das ministras de Sanidade e Consumo e de Agricultura, Pesca e Alimentación, de acordo co Consello de Estado, dispoño:

Artigo único. Modificación do Real decreto 1275/2003, do 10 de outubro, relativo aos complementos alimenticios.

O anexo II do Real decreto 1275/2003, do 10 de outubro, relativo aos complementos alimenticios, modifícase do modo seguinte:

Un. O punto 10 da sección A «Substancias vitamínicas», queda redactado da seguinte maneira:

«10. Folato:

- a) Ácido teroilmonoglutámico.
- b) L-metilfolato cálcico.»

Dous. Na sección B «Sales minerais», engádesse, antes de «Acetato de zinc», a liña seguinte:

«Bisglicinato ferroso.»

Disposición derradeira única. Entrada en vigor.

Esta orde entrará en vigor o día seguinte ao da súa publicación no «Boletín Oficial del Estado».

Madrid, 8 de maio de 2007.—A vicepresidenta primeira do Goberno e ministra da Presidencia, María Teresa Fernández de la Vega Sanz.

9510 *ORDE PRE/1275/2007, do 8 de maio, pola que se modifica o anexo do Real decreto 956/2002, do 13 de setembro, polo que se aproban as substancias que se poden engadir para fins de nutrición específicos nos preparados alimenticios destinados a unha alimentación especial (dietéticos). («BOE» 112, do 10-5-2007.)*

O Real decreto 956/2002, do 13 de setembro, polo que se aproban as substancias que se poden engadir para fins de nutrición específicos nos preparados alimenticios destinados a unha alimentación especial (dietéticos), establece a lista de substancias que se poden engadir para fins de nutrición específicos aos alimentos destinados a unha alimentación especial (dietéticos), regulados polo Real decreto 2685/1976, do

16 de outubro, polo que se aproba a regulamentación técnico-sanitaria para a elaboración, circulación e comercio de preparados alimenticios para réximes dietéticos e/ou especiais, incorporando ao noso ordenamento xurídico a Directiva 2001/15/CE da Comisión, do 15 de febreiro de 2001, sobre substancias que se poden engadir para fins de nutrición específicos en alimentos destinados a unha alimentación especial.

O citado real decreto establece no seu único anexo a lista de substancias químicas que se poden engadir aos alimentos destinados a unha alimentación especial, especificando as categorías e condicións de uso.

A disposición derradeira segunda do Real decreto 956/2002, do 13 de setembro, habilita os ministros proponentes, no ámbito das súas competencias, para ditar as disposicións necesarias para o desenvolvemento do establecido no real decreto citado, e en particular para actualizar o seu anexo.

Este anexo foi actualizado mediante a Orde PRE/3520/2004, do 29 de outubro de 2004, incorporando ao noso ordenamento xurídico interno a Directiva 2004/5/CE da Comisión, do 20 de xaneiro de 2004, pola que se modifica a Directiva 2001/15/CE co fin de incluír determinadas substancias no anexo.

No momento da adopción da Directiva 2001/15/CE da Comisión, do 15 de febreiro de 2001, non se puideron incluír no seu anexo unha serie de substancias químicas engadidas para fins de nutrición específicos en alimentos destinados a unha alimentación especial comercializados nalgúns Estados membros, porque non foran avaliadas polo Comité Científico da Alimentación Humana (CCHA).

A Comisión Europea adoptou recentemente a Directiva 2006/34/CE da Comisión, do 21 de marzo de 2006, pola que se modifica o anexo da Directiva 2001/15/CE en canto á inclusión de determinadas substancias, co fin de incluír no anexo as substancias químicas que foron avaliadas desde entón pola Autoridade Europea de Seguranza Alimentaria e que recibiron unha avaliación científica favorable.

Por conseguinte, resulta necesario incorporar a mencionada Directiva 2006/34/CE da Comisión, do 21 de marzo de 2006, ao ordenamento xurídico interno, o que se realiza mediante esta orde incorporando estas novas substancias ao anexo.

Na elaboración desta disposición foron oídos os sectores afectados, consultadas as comunidades autónomas e emitiu informe preceptivo a Comisión Interministerial para a Ordenación Alimentaria.

Na súa virtude, por proposta dos ministros de Sanidade e Consumo, de Agricultura, Pesca e Alimentación e de Industria, Turismo e Comercio, de acordo co Consello de Estado, dispoño:

Artigo único. Modificación do anexo do Real decreto 956/2002, do 13 de setembro, polo que se aproban as substancias que se poden engadir para fins de nutrición específicos nos preparados alimenticios destinados a unha alimentación especial (dietéticos).

Modifícase o anexo do Real decreto 956/2002, do 13 de setembro, polo que se aproban as substancias que se poden engadir para fins de nutrición específicos nos preparados alimenticios destinados a unha alimentación especial (dietéticos), da maneira que se expresa no anexo desta orde.

Disposición derradeira única. Entrada en vigor.

Esta orden entrará en vigor o día seguinte ao da súa publicación no «Boletín Oficial del Estado».

Madrid, 8 de maio de 2007.—A vicepresidenta primeira do Goberno e ministra da Presidencia, María Teresa Fernández de la Vega Sanz.

ANEXO

Modificación do anexo do Real decreto 956/2002,
do 13 de setembro

Substancia	Condições de uso	
	Todos os dietéticos	Só en alimentos dietéticos destinados a usos médicos especiais
Categoría 1. Vitaminas. O encabezamento «Ácido fólico» substitúese por «Folato», e engádesse a liña seguinte: L-metilfolato cálcico	X	
Categoría 2. Minerais. Baixo o encabezamento «Magnesio» engádesse a liña seguinte: L-aspartato magnésico		X
Baixo o encabezamento «Ferro» engádesse a liña seguinte: Bisglicinato ferroso	X	

MINISTERIO DE TRABAJO
E ASUNTOS SOCIAIS

9689 REAL DECRETO 614/2007, do 11 de maio, sobre nivel mínimo de protección do Sistema para a Autonomía e Atención á Dependencia garantido pola Administración xeral do Estado. («BOE» 114, do 12-5-2007.)

A Lei 39/2006, do 14 de decembro, de promoción da autonomía persoal e atención ás persoas en situación de dependencia, establece no artigo 7 que a protección da situación de dependencia se prestará de acordo cos seguintes niveis de protección: un nivel mínimo de protección garantido pola Administración xeral do Estado, un nivel de protección acordado entre a Administración xeral do Estado e cada unha das comunidades autónomas e un nivel adicional que poden establecer, pola súa parte, as comunidades autónomas con cargo aos seus orzamentos.

O artigo 9 da Lei 39/2006, do 14 de decembro, dispón que o Goberno, oído o Consello Territorial do Sistema para a Autonomía e Atención á Dependencia, determinará o nivel mínimo de protección garantido para cada un dos beneficiarios do sistema, segundo o grao e nivel da súa dependencia, como condición básica de garantía do dereito á promoción da autonomía persoal e atención á situación de dependencia. O artigo 32.2 establece, canto ao seu financiamento, que a Administración xeral do Estado asumirá o custo deste nivel de protección.

O nivel mínimo de protección garantido pola Administración xeral do Estado, que este real decreto regula, contribúe ao financiamento do Sistema para a Autonomía e Atención á Dependencia, facendo posible o acceso ás prestacións de dependencia en condicións de igualdade en todo o territorio do Estado.

Corresponde ás comunidades autónomas a xestión dos recursos económicos que constitúen este nivel mínimo de protección, mediante o recoñecemento do grao e nivel

de dependencia e a provisión dos servizos e prestacións para a promoción da autonomía persoal e atención á dependencia.

O obxecto, por tanto, desta disposición é regular o nivel mínimo de protección garantido pola Administración xeral do Estado.

Este real decreto someteuse á consulta do Comité Consultivo, do Consello Estatal de Persoas Maioras, do Consello Nacional da Discapacidade e do Consello Estatal de Organizacións non Governamentais de Acción Social, e recibíuse informe do Consello Territorial do Sistema para a Autonomía e Atención á Dependencia.

Esta norma dítase en uso da facultade conferida ao Goberno na disposición derradeira sétima da Lei 39/2006, do 14 de decembro.

Na súa virtude, por proposta do ministro de Traballo e Asuntos Sociais, con informe do Ministerio de Economía e Facenda, de acordo co Consello de Estado, e despois da deliberación do Consello de Ministros na súa reunión do día 11 de maio de 2007,

DISPONGO:

Artigo 1. *Obxecto.*

Este real decreto ten por obxecto establecer a regulación do nivel mínimo de protección proporcionado pola Administración xeral do Estado ao Sistema para a Autonomía e Atención á Dependencia.

Artigo 2. *Niveis de protección do Sistema para a Autonomía e Atención á Dependencia e achega da Administración xeral do Estado para o seu financiamento.*

1. A participación da Administración xeral do Estado adecuarase ás previsións do artigo 7 da Lei 39/2006, para os seguintes niveis de protección:

- O nivel de protección mínimo establecido pola Administración xeral do Estado.
- O nivel de protección que se acorde entre a Administración xeral do Estado e a administración de cada unha das comunidades autónomas a través dos convenios previstos no artigo 10 da lei.

2. A Administración xeral do Estado proporcionará o financiamento necesario para a cobertura do nivel de protección mínimo a que se refire o artigo 9 da lei, consonte o previsto no artigo 3 deste real decreto.

3. Igualmente, a Administración xeral do Estado porá ao dispor das comunidades autónomas, a través dos correspondentes convenios, o financiamento resultante das previsións anuais da Lei de orzamentos xerais do Estado, unha vez aprobadas mediante real decreto as intensidades dos servizos, a compatibilidade e incompatibilidade entre eles e a contía das prestacións económicas dos niveis mínimo e acordado a que se refiren os artigos 10.3 e 20 da lei.

4. Así mesmo, a Administración xeral do Estado asumirá as cotizacións correspondentes á seguranza social dos coidadores non profesionais a que se refire o artigo 18.3 da lei.

Artigo 3. *Configuración do nivel mínimo de protección.*

1. O nivel mínimo de protección da situación de dependencia, previsto no artigo 7.1 da Lei 39/2006, do 14 de decembro, garántese mediante a fixación dunha cantidade económica que a Administración xeral do Estado achega ao financiamento do sistema por cada un dos beneficiarios recoñecidos como dependentes segundo o seu grao e nivel, para as prestacións de dependencia previstas no seu programa individual de atención.